


# 't Kerkje van Ellesdiek



Oecumenische bieveenkomst

**Dien durpel ee**

19 april 2015



Uutleg bie de tēkenienge.

Het thema is dit kêr: 'Dien durpel ee'.

't Is dien ik een eële stap om d'r over te gaen. Of za't meevaolle?  
Mu zu't oare van Hannie.

Jopie Minnaard.

## Liturgie Ellesdiek 19 april 2015

Thema: “Dien durpel ee”

Urgelmuziek (Ko de Visser)

Welkom (Anja Kopmels)

(me gae stae)

Zienge Psalm 121 vers 1 en 4

1. Tegen de bergen zie ik op:  
oôgten van noord toet zuud  
welk mèn's elp mien ier uut?  
Mien Elper is den Eêre God,  
die ei oalles eschaepe.  
Um waekt en za nie slaepe.
  
4. Den Eêuwigen stae voe je in,  
wan Um zie zonder meêr  
mie liefde op je neer -  
bewaer je kommen en je gaen.  
Je ziele, eêl je leven  
staet in Zien and eschreve.

Durpelgebed

(Hannie Oele)

- V: Eêuwigen, G'd, me stae ier op den durpel van Joen 'uus.  
G'reêd om nì binnen te gaen.  
Mè toch kù me de moed soms misse  
om die stap te zetten. Om in Joe licht te leven.
- A: D'r bin zòvee durpels in een mèns z'n leven.
- V: Durpels dî a me mè moeilijk overene stappe  
Die van kwaed'eit en onvrede.  
Die van iesdere wille en bluve vrokke.
- A: D'r bin zòvee durpels in een mèns z'n leven.
- V: Oôge durpels. Dir a me nie overeene zie.  
Die van spiet en schaemte.  
Die van ziekte en vee verdriet.
- A: D'r bin zòvee durpels in een mèns z'n leven.
- V: Eêuwigen, G'd, 'elp Jie ons d'r overene.
- A: God, 'elp ons over den durpel nì 't licht.

(me gae zitte)

Mie z'n vieren

Gezegend bin Jie (VL 542)

*Gezegend bin Jie om je wies'eid  
die a oans nie kunne zie,  
dien drôôm dî a Jie aoltied in glôôft  
oaltied en in eeuwigheid:  
da oans ôôit zulle worre  
mensen in et volle licht.*

Verhaal over de plekke in 't bos

(Marga van de Plasse)

Mie z'n vieren

Oôgen – ze zoeke me (VL 842)

*Oôgen - ze zoeke me. Volge. Mè toet wî?  
'k Gae een bocht om wîr a gin licht komt  
gin 'and me vast 'oudt, ginêên weet wien a 'k bin  
ginêên wat zeit, mien naem niks zeit  
dir a gin mènes is, dir a gin god is.  
Oôgen - ze zie mien, die zie mien di an.*

Lezieng

Genesis 28: 10 t/m 29: 1 (Corry Verburg)

Zienge

Lied 419 NLB

1. Weune, overal nergens tuus  
aerde, m'n aerde, m'n moeders uus  
een sterr' is 'evaolle, de maen' uut 'egae  
mènsen die oprieze, vadder gae.  
Mènsen, 't gae je goed.
2. Weune, overal even tuus  
ier en daèr en wee nae 't volgend' uus  
achter- of voorgae, mè noît stille stae  
waege en winne en vadder gae.  
Mènsen, 't gae je goed.
3. Weune, overal bienae tuus  
aerde, m'n 'emel, m'n vaoders uus  
een sterr' is gae glanze, de maen' is voldae  
mènsen die droôme - een stemme verstaet.  
Mènsen, 't gae je goed.

## Overdienkieng

Zienge

Gezang 419 Liedboek voor de kerken

1. D'n Eêr ei mien 'ezie en onverwachs  
bin'k overnieuw gebore en 'etoge.  
Um ei mien licht ontstoke in de nacht –  
mien arte leeft – ik kiek aars uut me'n oôgen.  
En ie kom zachjes, mè mie overmacht;  
ok a 'k tekort schoot, ei t'N dat verdroke.
  
2. As aesem gît den Eêr oans in en uut,  
ei oanze naemen op Zien and 'eschreve,  
wil in oans weune, liek as in een uus,  
as vaste stekken plant 'N in oans 't leven.  
Me bin vertrouwd – me spele as twì guus;  
wat a me bin dat ei t'N oans 'egeve.
  
3. Die a Joe lief bin, geef Je 't in d'r slaep,  
Joe naem zaai Jie eêl diep'in oanze droômen.  
Jie ei oans zelf di vatbaer voe 'emaekt –  
zò a de regen druupt op struiken, boômen,  
net as de wind, gin mènes weet wì t'n gaet,  
net eênder zù ok Jie over oans komme.

Voorbeden

(Corrie de Baar)  
acclamatie:

Mie z'n vieren

:



Roep oan-ze nae-men da me Joe oa - re  
da me wee ae-se me en uut Joe lee - ve.

Aollemille:

Roep oanze naemen, da me Joe oare  
da me wee aeseme en uut Joe leve.

Oanze Vaoder

Ônze Vaoder in den emel  
Joe Naem wor eheiligd  
Je koninkriek za komme  
Je wille za geschiede  
zòwel in den emel as ok op d'aerde.  
Geef ôns heden ôns daegelijks broôd  
En vergeef ôns ônze schulden  
Zòas ôns ok vergeve die ôns wat schuldig bin.  
En brieng ôns nie in verzoeking  
mae verlos ôns van et kwaeje.  
Want van Joe is et koninkriek  
en de kracht en de heêrlijkheid  
tot in eêuwigheid.  
Amen

Zienge

Lied 809 NLB

①  
Bluuf nie stae - re\_\_\_ op ver - bie - jen tied

②  
bluuf nie stae bie lank\_\_\_ ge\_\_\_ lee - je.

③  
Um zeit: Ik gae wat aars be - gun - ne; et

④  
is a be - gon - ne, wor je 't ge - waer?

Mie z'n vieren

Tonge voe taal NLB 690

*Tonge vol taal,  
mie 't loflied op m'n luppen  
pries ik den dag  
nog voe a 't aevend is.*

*Jie zù Joe naem  
ok eêr' op aerde andoe;  
'k zienge Joe lof  
wan Jie bin op'estae.*

*Is t'r een licht –  
een zonne boven 't duuster –  
licht dat a 't van  
et aerdedoenger wint*



*Ik prieze 't vier –  
die wermte uut d'n emel,  
zò da in mien  
een nieuwen dag begunt.*

Collecte

In maerte was de opbriengst 92,05 euro voe  
Focus 2 en 80,20 euro voe 't Kerkje.

Zienge

Lied 655 NLB

1. Zieng voe den Eêr' een eêl nieuw lied!  
Ie doe vee wonders deur den tied:  
Ie zurg da in je wildernis  
ard steên een bron van waeter is.
2. Mie wolk' en vier gaet Um joe voor,  
geef ruste op je levensspoor.  
Zien stut en steun raek joe nie kwiet;  
zieng voe den Eêr' een eêl nieuw lied!
3. Jie stae versted en ziengt et uut  
da God joe naem mie zurg omsluit –  
joe leven uut de schraele grond  
as paeseblomme boven komt.
4. Veetieds wor ier een mèn's 'eknecht;  
bie God kom ieder toet z'n recht.  
Zien Geêst die mikt een mèn's bekwaem  
om God z'n teêkens te verstaen.

5. En eênmal in 't beloofde land  
 waer a me voluut leve, dan  
 zulle me zienge keêr op keêr  
 glad een nieuw lied voe God den Eêr'.

(me gae stae)

Zegen

Mie z'n vieren:

Wees 'ezegend (LB 814)

The musical score is written in 3/4 time and consists of three staves. Above the first staff are chord markings: F, C, F, C, F. The lyrics are: Wees 'e - zee\_\_ gend, op pad en on - der - weg, wees 'e - zee\_\_ gend. The score includes first, second, and third endings, indicated by circled numbers 1, 2, and 3 above the staves. The first ending leads to the second ending, and the second ending leads to the third ending. The third ending concludes with a double bar line.

(me gae zitte)

Mie z'n vieren

A God oans tuus briengt (VL 122)

*A God oans tuus briengt,  
 bin me gin vrèmden mî.  
 Dae kan 'k van droôme!  
 A God oans tuus briengt,*

*bin me gin vrèmden mî.  
Dae kan 'k van droôme!*

*Dan zû me zienge en lache van geluk.  
Dan zei de wèrld: Joe God doe wonderen!  
Ja, Jie doe wonderen, God onder oans ier,  
Jie brieng wee blienschap!*

*Brieng oans naer uus. Brieng oans toet leven.  
Liek as de dulven in droôgen tied.  
A 't wee gae regene  
gae 't waeter stroôme.*

*Mie pien' en moeit' ezaaid  
mè d' oest' is blienschap!  
Een mèn's onderweg  
zaai bie eêl vee traenen  
mèr 'oôr t'n zienge  
bie oal z'n schoven!*

*A God oans tuus briengt,  
bin me gin vrèmden mî.  
Dae kan 'k van droôme!  
A God oans tuus briengt,  
bin me gin vrèmden mî.  
Dae kan 'k van droôme!*

Slotwoord

De bieënkoms is laeter te beluusteren op [www.ellesdiek.nl](http://www.ellesdiek.nl) onder de kop Oecumene.  
Ok kan je di de liturgie bekieke.

## **Wat a t'r de kommende tied te doen is in 't Kerkje**

zaterdag 25 april      Open mirreg tentoanstellege Anita Martens  
13.30 – 16.00 uur

zondag 26 april      Iers en nog es Iers. Woodworks en  
14.30 uur              The Six Beggars. Toegank 8 euro.

zaterdag 2 meie      Openieng tentoanstellege. Glaskunst en  
14.30 uur              schilderieën van Aja Snelleman. Muziek.

zaterdag 16 meie      Open mirreg tentoanstellege Aja Snelleman.  
13.30 – 16.00 uur

zondag 17 meie      Oecumenische bieënkoms mie een  
14.30 uur              overdienkieng deur Bas Rentmeester.  
  
Thema: Bin jie ok zò vergeetachtig?  
  
Jopie Minnaard vertelt een verhaal.